



Senin 30 Januari 2023

Perb.Rasul 10:1-8



"Ngaturken Pendahin"



I bas gerejanta enggo silakoken pekan penatalayanen, i je kita enggo ersikap ndahiken dahin gereja ras perpulungen sada tahun ku lebe. Dahin e iampeken man banta kerina perpulungen subuk nande, bapa, anaka si nguda bage pe anak sekolah minggu. Kerina kita banci ndahiken dahin e rikutken talenta ras kengasupenta sekalak-sekalak. Arah paksa tenengta enda ipersingeti kita tole uga menatalayanken dahin e benaken i bas jabu nari.

Jabu Kornelius e me jabu si nembah Tuhan alu tutus. Ia sekalak komandan i bas pasukan tentara Romawi. Ketutusenna erDibata teridah arah kininggitenna nampati kalak si musil baban geluhna. Hubungenna ras Dibata tetap ibangunna arah pertoton. Ulih hubungan si mehuli ras Dibata, teridah arah perbahanenna si mehuli man sekelewetna. Kornelius selaku bapa mabai anak jabuna ngikutken kai si ibahanna. E maka se isi jabuna melumbar nampati kalak musil. Perbahanen Kornelius enda tangkas kerina man Dibata, e maka ipaken ipake Tuhan jabuna e jadi ingan man Petrus kesilang piga-piga wari. Isuruh Malaikat Tuhan Kornelius ngaturken si erdahinna ngelegi Petrus ku Jope. Situhuna lit si tersirat i je e me gelah Petrus lanai tertutup man kalak jahudi saja. Nggit ia bengket ku rumah kalak si labo Jahudi sabap kerina nge suku e bali i bas mata Dibata. Sedekah enda pengakap kalak Jahudi maka ia ngenca bangsa Dibata, la banci bengket ku rumh kalak si labo jahudi, sabap iakapna e kafir. Pengangan Petrus pe bali denga ras pengangan kalak Jahudi e. E maka isuruh Tuhan gelah Petrus bengket ku rumah Kornelius si labo kalak Jahudi gelah iidahna seri kerina suku i bas mata Dibata. Kornelius sikap ndahiken dahin si isuruh Malaikat e, iaturkenna pendahin sierdahinna, lako berkat ku Jope ngelegi Petrus. Kerina si berkat e kalak si erkemalangen man Tuhan, amin pe ia labo kalak Jahudi. Kalak si malang man Tuhan pendahinna pe kerina sikap dingen ratur.

Si tata pendahinnta, tetap malang man Tuhan.



Blank writing area with a wavy top edge.